

Diabierna 29 September 2023

Email: IslaOnline@gobierno.aw Tel: 528-4952

GOBIERNO DI ARUBA



20
SEPTEMBER
2023


2^a AÑA
Gabinete Wever-Croes ||

EVELYN WEVER-CROES
URSELL ARENDS
Xiomara MADURO
DANGUI ODUBER
GEOFFREY WEVER
ROCCO TJON
ENDY CROES
GLENBERT CROES


**TRAHANDO HUNTO DEN MESUN UNION Y CU MAS POSITIVISMO CADA DIA,
PA ARUBA SIGUI RECUPERA.**



"Nos no ta ainda caminda cu nos mester ta, pero nos ta riba e bon caminda".

PROME MINISTER *Evelyn Wever-Croes*

#ArubaRecupera
#UnidadDenAccion
#gabinetewevercroes2
#unionypositivismo
#cuamorpaaruba



TELEARUBA A HUNGA UN PAPEL IMPORTANTE, DURANTE PANDEMIA, DEN MANTENE E COMUNIDAD DI ARUBA BON INFORMA

"Mi ta felicita Telearuba cu nan di 60 aniversario, sirbiendo pueblo exitosamente"

Prome Minister Evelyn Wever-Croes ta felicita, den nomber di Gobierno di Aruba, nos planta nacional di television, Telearuba cu nan di 60 aniversario. Como isla chikito den Caribe, Aruba semper a desea di tin su mesun planta di television. E deseo aki a wordo cumpli, dia 29 di September, 1963 pa 7or di anochi, na momento cu Telearuba a bay den aire pa prome biaha como e prome planta di television estableci na Aruba. Esaki sigur tabata un momento di hopi emocion y orguyo pa e comunidad, y cu awe nos ta celebra 60 aña di existencia di e planta aki, cu a sa di sirbi pueblo exitosamente.

Prome Minister ta gradici e staff y personal actual di Telearuba, pero tambe tur esnan cu a yega di labora eyan, y a sa di comunica y informa pueblo na un manera transparente pa 60 aña largo. Danki na nan dedicacion y pasion, e comunidad di Aruba semper tabata bon informa riba tur antecedente local y internacional. Tambe Telearuba a sa di brinda entretenimento, transmitiendo tur actividad cu tabata andando riba e pida baranca aki.

"Ta importante pa menciona, cu tempo cu Aruba a wordo enfrenta cu e pandemia mundial devastador covid19, Telearuba como nos planta nacional, a sa di brinda mi tur apoyo pa informa pueblo tur dia riba e desaroyo di e pandemia aki. Tambe mi ta gradici sr. Andrew Vrolijk di Telearuba pa su conseho valioso na momento cu mi mester a anuncia pa prome biaha



cu covid19 a yega Aruba. Sr. Vrolijk a bisa mi persona, "cu na momento cu mi ta haci un conferencia di prensa pa duna pueblo un noticia asina negativo, semper caba e conferencia cu un mensahe positivo", e conseho aki mi a aprecia hopi mes, y a sigui practica na tur momento. Pues un danki di curason na Telearuba y su staff y personal pa semper ta atento, dedica, y transparente. Masha pabien cu boso aniversario y hopi aña mas di existencia" Prome Minister a expresa.

Prome Minister Evelyn Wever-Croes:

SCOL PREPARATORIO CACIQUE ATERIMA A RICIBI MATERIALNAN INNOVATIVO, CU E PROYECTO DI EDUTECH

"Mi ta spera cu e materialnan aki, sirbi como herment pa fortalece e sistema di enseñansa pa nos muchanan"



Diahuebs mainta, Prome Minister Evelyn Wever-Croes a bishita Scol Preparatorio Cacique Aterima, pa mira con e scol a aplica e premionan cu nan a gana den ciclo 3, cu e proyecto di Edutech. Prome Minister a expresa di ta sumamente contento di wak con entusiasmo e muchanan ta cu e materialnan, no solamente educativo sino innovativo, cu nan a haya pa traha cune.

Scol Preparatorio Cacique Aterima, a gana cu e proyecto di Edutech, varios material y weganan cu ta diseña pa introduci e muchanan di kleuter na STEM (science, technology, engineering y math), E "spotlight" di e proyecto ta "Jack the Mouse", cu ta un raton, cu tin den cada klas pa di un manera innovativo e muchanan siña e sistema di "coding", cu ta hopi esencial tambe pa e futuro di nan.

Cu e sistema di coding e muchanan por siña con pa traha nan mesun weganan, y kico tur ta necesario pa e wega funciona optimal. Tambe nan a haya un "kit" caminda nan por traha nan mesun auto of robot. E weganan ta diseña pa siña nan e habilidadnan di siglo 21, manera con pa resolve problema, colaboracion, comunicacion, y ta desaroya nan imaginacion

tambe. E materialnan aki, ta siñanan "hands on" en bes di djis siña over di STEM riba ipads. E docentenan tambe ta sumamente contento cu e materialnan ricibi, cu ta facilita e manera di prepara e muchanan pa siglo 21.

Na su turno, cabesante di scol, sra Maritza Carrion tambe a expresa di ta hopi contento cu Scol Preparatorio Cacique Aterima a logra gana e proyecto di Edutech, ya cu e materialnan aki ta yuda amplia e curriculum na scol, y yuda na un manera innovativo pa prepara e muchanan pa un mihor futuro.

"Mi ta gradici e cabesante di scol, y tur docente, pa kere den e proyecto di Edutech, y mi ta felicita nan cu e materialnan nobo cu nan a gana. Mi ta spera cu e materialnan aki sirbi como herment pa fortalece e sistema di enseñansa pa nos muchanan. Tambe, mi kier recorda tur scol, cu Edutech lo continua, y pa nan prepara nan proyecto pa asina nan tambe por gana materialnan innovativo pa nan scol. Masha pabien na tur maestro, mayor y alumno di Scol Preparatorio Cacique Aterima cu nan premio di Edutech" Prome Minister a expresa.



“Un manejo marca pa resiliencia, unidad, y positivismo solido”.

MINISTER *Xiomara Maduro*

#ArubaRecupera
#UnidadDenAccion
#gabinetewevercroes2
#unionypositivismo
#cuamorpaaruba



Minister di Cultura ta invita comunidad pa asisti diadomingo 1 di oktober na:

E PROME 'SANI COFFEE FEST' RIBA DIA INTERNACIONAL DI KOFFIE NA MUSEO INDUSTRIAL NA SAN NICOLAS

Un koffiemorgen pa anuncia e exposicion 'un industria inespera' y pa brinda reconocimiento na nos pioneronan

Diadomingo 1 di oktober ta Dia Internacional di Koffie y riba e dia aki Ministerio di Cultura hunto cu Fundacion Museonan Arubano FMA ta organisa un koffiemorgen dilanti Museo di Industria cu ta conta cu e presencia di diferente negoshi cu ta bende koffie. Lo tin musica di cah'i orgel y di e artista Chris Kross y un 'workshop' special pa nos muchanan por haya sa mas di koffie. E koffiemorgen lo ta di 9or pa 1or pm.



Riba e dia aki tambe lo anuncia un exposicion nobo na Museo di Industria na San Nicolaas. Ta trata di e exposicion 'Un industria inespera' cu ta conta e historia di e industria di koffie na Aruba cu den añanan 60 y 70 a florece na nos Pais danki na e creatividad di Aruba su comerciantenan. Hopi no sa di e historia cu Aruba sin a produci un solo mata of boonchi di koffie, tabata un exportador grandi di koffie den nos region. Danki na e buki 'E Negoshi di Koffie' di sr. Benjamin Romero, awe e historia mercantil di e industria di koffie na Aruba ta relata y conserva. Pa e historia aki keda bon conserva, Museo di Industria lo conta cu un exposicion nobo cu lo conta e historia di e negoshi di koffie y recorda nos riba e creatividad di nos hendenan cu ta fuente di inspiracion.

Minister Maduro di Cultura ta extende un invitacion na comunidad pa diadomingo awo pasa un rato dilanti Museo di Industria den Torenstraat na San Nicolaas pa disfruta di un dushi kopi di koffie, haya sa mas di nos historia y brinda un homenahe na e baluartenan cu tabata e pioneronan den e negoshi di koffie na Aruba.

MINISTER MADURO TABATA PRESENTE DEN E PROGRAMA 'NOS MAINTA' PA CELEBRA E DI 60 ANIVERSARIO DI NOS PLANTA NACIONAL TELEARUBA




Diabierna mainta, Minister di Finansa y Cultura tabata presente na Telearuba pa asina celebra e 60 aniversario di nos planta nacional den un programa special di Nos Mainta. E mandatario a hiba palabra pa felicita Telearuba pa e bunita aniversario aki na unda cu door di añanan por a mira con nos planta nacional a sigui innova.

Desde cu a fund'e na aña 1963, Telearuba a bira un contribuidor valioso na e panorama cultural di nos Pais, hayando audiencia cu su amplio repertorio di programacion. Minister Maduro ta admira Telearuba pa su dedicacion den provee contenido di calidad halto cu ta refleha e rikesa di cultura y herencia di Aruba. Door di su focus innovativo y su compromiso na excelencia, Telearuba a hunga un papel sumamente importante den forma e panorama di media local y formacion di talentonan Arubiano.

'Ta cu sumo placer mi ta extende mi felicitacion na e staff y personal di Telearuba na e ocasion importante aki' Minister Xiomara Maduro a bisa. 'Pa seis decada, Telearuba a bira un fuente di orguyo pa nos Pais, mustrando lo miho di nos cultura, arte y entretenimiento. Nos ta warda cu curiosidad e desaroyo di nos planta nacional pa cu futuro'.

E celebracion di e 60 aniversario di Telearuba ta un testimonio di e dedicacion duradero na presenta contenido excepcional y su conexon cu comunidad. Minister Maduro ta aplaudi e dedicacion di Telearuba pa preserva y promove nos herencia cultural por medio di television. Mientras cu Telearuba ta continua cu si siguiente capitulo, Minister Maduro ta deseana exito y cu nan por sigui cu nan contribucion valioso na nos panorama cultural y artistico.





"Hunto nos a demostra
cu nos por supera
tur reto".

MINISTER *Geoffrey Wever*

#ArubaRecupera
#UnidadDenAccion
#gabinetewevercroes2
#unionypositivismo
#cuamorpaaruba



Dia 29 di september 1963, Telearuba a transmiti su señalnan pa Aruba pa prome biaha. Cu un solo camara, un solo studio y cu un solo meta: pa entretene y informa comunidad di Aruba.

Awe nos ta uni den celebracion di 60 Aña di existencia di Telearuba. 60 aña di excelencia brindando pueblo informacion, entretenimento, y conservando parti di nos historianan cultural a traves di Telearuba su transmicion.

Danki y pabien na henter e famia di Telearuba.



Awe merdia nos tabata t'ey presente na e clausura di e programa special, celebrando 60 Aña di Telearuba. Pabien y danki na henter e famia, presente y pasado, di Telearuba cu e logro bunita aki!





“Unidad y positivismo
ta sigui alumbra nos
caminda.”.

MINISTER *Endy Croes*

#ArubaRecupera
#UnidadDenAccion
#gabinetewevercroes2
#unionypositivismo
#cuamorpaaruba

A LANSA E PROYECTO DI BUS WAW CU E META DI PROMOVE DEPORTE DEN BARIO



Durante e prome edicion di Ban Caya den e bario di Noord, a lansa e bus Weganan Ariba Wiel (WAW). Esaki ta un proyecto pa comunidad den bario di IBISA, CEDE Aruba, FCCA y Barionan Unico. E meta principal di bus WAW ta pa duna e hobennan den bario oportunidad pa experiencia deporte y movecion en general. E bus di movecion, WAW lo move rond di Aruba na localidad specifico den diferente bario, manera Village, Bushiri, Cura Cabai Zuid y Eagle Beach.

Durante un siman, e bus lo tin actividad deportivo na e cuater

(4) barionan aki. Lo tin dos instructor na e localidadnan aki dunando actividad fisico, di 5:30 pm pa 6:30 pm. E intencion di esaki ta pa mas adelante bay den otro barionan di Aruba tambe. E bus ta ekipa cu diferente material deportivo pa por organisa un actividad den bario. Durante e lansamento di bus WAW, Minister di Enseñansa y Deporte Endy Croes a score e prome gol, estrenando e materialnan deportivo di e bus pa prome biaha. Minister Endy Croes ta felicita IBISA, CEDE Aruba, FCCA, Barionan Unico y Gobierno di Aruba cu e bunita proyecto deportivo aki.



**Den e ultimo dos aña,
Gabinete Wever-Croes
a lidera cu determinacion
pa avansa e isla pa un
futuro mas briyante,
prospero y sostenibel.
A traves di liderazgo cu vision,
Gobierno di Aruba
a prepara e tereno pa
crecimiento economico,
di sostenibilidad
y bienestar social.
Nos ta riba e rumbo
pa prosperidad duradero.**

**#ARUBARECUPERA #UNIDADDENACCION
#GABINETEWEVERCROES2 #UNIONYPPOSITIVISMO
#CUAMORPAARUBA**

